



Herremättli-Clique 1921

Sujet 2019

#kaisujet

Kai Mainig, kai Sujet, kai Eerger!
Woo isch d Naarefraihait bliibe?

Mir mechte-n-is nit mit ere Mainig in d Nessel setze,
me waiss jo efangs nim, wär me mit waas duet verletze.
Hittigsdaags kunnsch jo fir jeede Saich scho draa,
au unsere Cliquenamme muetet scho Frauefindlig aa.

Doorum hänn mir uns bim beschte Wille,
au nooch vyyle Bier in dr Knille,
und mängger Nacht driiber phenne,
fir kains vo deene Sujet entschaide kenne:

„Fischerstuube, dangge und aadie Karim“
Mir wurde gärn em Karim danggscheen saage,
aber das kenne mir nit mache mit em Waage.
S kennt Verdacht uf Wäärbig an dr Fasnacht entstoo,
drum leen mir doo lieber d Finger drvoo.

„Nätti Toilette“
Die nätte Toilette sin zem Saiche und zem Schysse.
Mir findes geniaal und mechte si nit misse.
Am Cortege mit blutem Fiidle drgeege,
wurde mir effentligs Eergernis erreege.

„Basel als Gascht bim Säggssilyyte“
Saisch de findsch dä zürcher Aaloss e glatti Sach,
griegsch bistimmt vo de Hardcorebebbi ains uf s Dach.
Findsch dr Beeg und d Zürcher eender pyynlig,
bisch e Fremdehasser, seer woorschyynlig.

„Dr schwyzer Tatort spiilt ney in Ziiri“
Dr schwyzer Tatort spiilt nim in Luzäärn,
drum luege mir dä Krimi nimme gäärn.
E Sujet doo druss z mache loont sich nit,
will daas numme Uffsee fir Ziiri git.

„Tamedia kauft d BaZ em Blocher ab“

D BaZ gheert jetze dr Tamedia,
dr Blocher will si nimme haa.
Vo aim Ziircher zem andere, persee.
E sottig Sujet duet nur wee.
Und nomool Ziiri, das ka nit syy.
Sin mir doo an dr Limmat oder am Rhyy?

„Basel Wave, wär will uf deere Wälle ryte“

Kinschtligi Wälle ryte, me sait au Söörfe,
sott me z Basel schyynts nit döörfe.
E eggoloogische Haafekäas puur,
e Brunz und schlächt fir d Natuur.
Die kinschtlig Wälle syg e Sääge,
bi Sunneschyynd und au bi Rääge.
Die Aargumänt sin drfiir und drgeege.
Mir kenne uns nit ainige und sin no am liberleege.

„Stroomussfall im Joggeli“

Bim FCB brennts numme no mit kleiner Flamme.
S Fyyr isch nimme doo, wie friener amme.
Dr Stroomussfall im Joggeli ka me simboolisch gsee.
Au daas Sujet däät numme wee.

„Dr Doppelkopfaadler an dr WM“

Ob Schwyz, Albaanie, Seerbie oder Kosovo,
alli schwätze und brichte drvoo.
S isch e Naarezyyg mit däm Doppelkopfgryff,
die Schuttibuebe sin doch nit ganz ryff.
Mir hän Schiss mit däm Sujet uf em Glaareblatt,
kennt das uusaarte in e Mentschehätz.

„Russischi Spioon in dr Schwyz“

Bi däm Sujet hän mir Bidängge und sin drum drgeege,
will mir mechte-n-is nit mit em Herr Putin aaleege.

„Wältruumbolizei“

Dr Trampel Donald us de USA,
mecht gäärn Wältruumschugger haa.
Ob die dr Sateliteverkeer sott kontrolliere
und Alkoholtescht duurefiere?
Was das soll isch uns schleierhaft,
drum hänn mir daas als Sujet au nit grafft!

„S Mässestäärbe“ oder „Adiee MUBA“

Was d Mässelaitig efangs duet biete.....
ai Mäss nooch dr andere isch e Niete.
S isch druurig und nit zem Lache,
drum kenne mir kai Sujet druus mache.

„Zwaihundert Joor Karl Marx“

Wenn das Sujet wäälsch, zellsch zue de Roote,
und kasch in bolitische Miilireeder groote.

„Buschi stille im Groossroot“

Im Groossroot doo hänn sis sträng,
will si kaini Buschi gschillt haa wänn.
Isch daas frauefindligi Bolytigg,
oder bolytisch korräggdi Grytigg?
Mir sinn is nit ainig waas richtig isch,
doorum isch au daas Sujet vom Disch!

Und uf Neybaseldytsch, laast bat not lyyst

„S Puff mit dr Negro und dr Mohrekopf“

Ischs Dradizioon und no zytgerächt,
oder ischs Rassismus und doodermit schlächt?
Ischs e hailigi Kueh wo me nit deerf schlachte,
oder muess me so Sache jetze verachte?

Mir wisses nit, mir wisse nuur:

„Eb wyss eb schwarz, eb grien, root oder blau,
me isch ainewääg dr Nääger..... und iir alli au“

*Me bsuecht d'Waage- und Reggwysyte-Uusstellig bi dr Kasäärne
und d' Laddärne-Uusstellig uff em Minschterplatz.
Sy steen deert vom Määntig znacht bis am Mittwoch demoorge.*